

嘉業堂
叢書

張說之文集

第五冊

張說之文集補遺卷第一

頌 銘 箴 表

起義堂頌

石橋銘

獄箴

賀示麻言表

賀祈雨感應表

讓兵部尙書平章事表

讓封燕國公表

讓中書侍郎表

讓右丞相表二首

讓中書令表

讓平章事表

讓起復除黃門侍郎表三首

謝觀唐昌公主花燭表
諫內宴至夜表

進鬪羊表

進佛像表

進渾儀表

幽州論戎事表

并州論邊事表

謝修史表

謝賜碑額表

謝京城東亭子宴送表

謝賜鍾馗及麻日表

荊州謝上表

謝問表

謝賜藥表

岳州刺史謝上表

起義堂頌

堯以天下禪舜舜以天下禪禹禹將宅百揆總萬國一讓於稷高再讓於皋繇稷高先舉彼商與周以之更盛皋繇後天我國家於茲受命非舜以考天而疇咨審靈命之陰騭非禹以享天而德讓知麻數之有歸及乎元元間出光大前慶垂道德而統運依清虛而立法天祚

我李厥惟舊哉并州起義堂者皇天造帝之初高祖誓
眾之地也隋氏失御國亂無家小道自賢大才胥忌惟
宮室陂池之好惟沈湎暴慢是保上帝不歆黎人咸戚
六車踰海而東敗萬乘過江而南覆豺狼入邑貔兪爭
人黔首囂然方將無訴我高祖感之乃龍躍晉水鳳翔
太原百神前驅萬姓來奔開咸陽入天門用湯武之兵
靜新室之亂遵唐虞之典承太王之基率百官受終於
文祖輯五玉班瑞於諸侯類圓禋方之禮封功爵德之
議允約法惟簡代虐以寬子惠困窮懷柔蠻貊金石一
變日月重華近古以來未有革命易姓若此之盛者也
非天私我有唐惟天祐于積德非唐求于人庶惟人懷

于累仁當此之時太宗內啟聖謀外行專斷躬擐甲胄
跋履山川駕英雄而爲奧主一區域而定大業周詩曰
昊天有成命二后受之信今之謂也若夫脩德以降命
奉命以造邦原濬者流長根深者葉茂天人報應豈相
遠哉觀周之興始於后稷公劉承以太王王季皆勤儉
忠厚克廣前烈至于文王成之武王啟之康王安之故
卜世三十卜年八百天所命也我唐之興也始於皋繇
元元承以景皇元帝皆立言邁德垂裕後昆至於高祖
受之太宗有高宗守之中宗復舊業睿宗祈壽福比
之周室我何謝焉且如陳德明刑庶其躬稼之績元宗
道要小其避狄之仁化流率土狹其江漢之域義甯大

朝羞其牧野之戰故武德中太行出大聲曰唐興理萬年蓋天之所命年代未可涯也仲尼曰惟天爲大惟堯則之又曰韶盡美矣又盡善也非至德其孰能如此其大者乎於戲先后捨元子而立予主鬯煩大位而付予天下自高祖創業百有六戰欽承丕緒十有四載東西南北無思不服山川鬼神亦莫不甯實惟藝祖儲福之所致豈予幼孫菲德之所及方將運心于玄妙之境厲志於造化之爐發令爲祥符施惠爲霖雨任賢爲兩曜仗能爲四時俾天之下有形者遂全懷生者自足樹鋪野蘭田種嘉穀斲雕爲樸捐珠棄玉追大庭而齊風夢華胥而同俗非曰能爾願宗祏而效焉癸亥之歲獻春

正月濟河橫汾省方展義存問黎老緬慕本邦城郭歸
然桑梓如舊覽風物之憂思尋王業之艱難惟高祖若
天地之開闢化成萬類惟太宗若日月之照臨光於四
表舉晉陽之甲除君側之盜由唐侯之封升天子之號
肇基發迹實在於茲仙駕無所或顧懷於舊土靈魄無
方儻來歸於北堂郡縣之所宜嚴奉前人有言曰禮不
忘本樂殊其德如姬詠周原而劉歌沛邑思我烈祖如
聞歎息之音嗟爾後人無忘成功之頌頌曰

皇矣上帝 臨下有赫 降監四海 求人之瘼

吁彼隋煬 其政不獲 眷我高祖 此惟其宅

天輔皋陶 明刑弼教 道濟老氏 尚友禮妙

仁表四乳 明燭獨照 隨父託心 史良辨貌

高祖誕靈 神光夜耀 天妹作合 日見夢紹

祚生文帝 膺運會昌 首唱高祖 鸞飛晉陽

萬夫一心 元戎啟行 火旗炎炎 雲鳥洋洋

五星迓帝 萬國謳唐 天網恢疏 王師節制

威惟連戮 老生摧斃 山祇引軍 河龍渡帝

渭倉散積 離宮弛閉 關輔來蘇 遠方咸惠

長安宮室 上法太微 隋遷寶鼎 唐在璿璣

伏入雙闕 詔出九圍 三靈協載 百祿同歸

帝謂太宗 表正封略 濤蕩廳埽 霆馳電爍

劔不摧鋒 弩無再彊 西平汧隴 東取河洛

杲密德充 頭懸面縛 北走獯鬻 南達蠻荆

遼碣作父 梁岐底平 風動神行 海隅蒼生

莫不來庭 於昭義堂 誓眾資始 天命所起

于胥頌美 維予小子 夙夜敬止 於戲皇王

緒思不忘

銘

石橋銘

玉梁架迴 碧沼涵空 石鞭海上 鎖鍛河中

橫漢飛鵲 規天拖虹 仙聖來往 風雲路通

箴

獄箴

官有決曹 掌茲法獄 匪惟議罪 亦以防欲

所貴仁恕 非矜窘束 吏苟吹毛 人安措足

古之爲主 是戒是勗 茫茫率土 蠢蠢羣生

賢愚中雜 眞僞相傾 若魚之駭 如鳥之驚

不能無犯 宜持以平 或大或小 時重時輕

無以快志 期乎得情 孰曰非重 國之政令

孰曰非輕 人之性命 虐則招咎 寬則納慶

宜慎宜恤 可畏可敬 爲獄則固 爲牢則幽

晨嚴管鑰 夜密更籌 寂寂園土 纍纍繫囚

求食搖尾 見吏垂頭 自昔立名 此爲非所

逼隘狹室 敬傾漏宇 冬有祁寒 夏多隆暑

馬可失入 馬可妄處 勿謂無妨 勿謂無傷

匹婦含怨 三年亢陽 匹夫結憤 六月飛霜

可以安危 可以興亡 敢告司憲 無輕國章

表

賀示麻書表

臣說等言內侍尹鳳祥至奉宣聖旨內出新撰麻書二
十五卷以示臣等竊窺深奧仰觀英華涉海登山罔知
攸際臣聞唐堯光宅順昊天而定四時虞舜登庸在璿
衡而齊七政伏惟開元聖神皇帝陛下至德廣運文明
濬哲道冠生知與神合契備往聖之能事紹昔王之盛
典發揮易象以應乘乾之時考正麻書更表履端之始

上包二帝下括三王徵晷運之盈虛究推步之疏密備稽氣象載躔坎離三辰順軌而更明五緯合度而增煥是使天地貞觀神人允諧唐虞舊章於斯重覩臣等幸陪書府得預朝門抃躍之情實萬恆品奉表陳賀以聞

賀祈雨感應表

臣說言臣聞水旱常數堯湯固有聖賢之理恭潔爲難自冬踰春積陽成亢陛下以時災繫政人患由君退巫女之雩卻應龍之請陛下躬自暴露炎景瞻仰雲漢推心引譴爲人受咎誠旣發而動天言剋期而降雨今已霖淫三日澤漏重泉草樹含欣郊原變色加以雲平雨細氣潤風和豈惟優渥王畿必將周徧天下羣心舒釋

聖情開暢無任萬姓歡悅之至謹奉表陳賀以聞

讓兵部尙書平章事表

臣說言伏奉九月十九日制書到并州授臣兵部尙書
同中書門下三品王人在門驛騎臨路奉恩循分以慚
以惕臣說中謝臣早以書生射策載筆聖朝晚以軍志典
兵秉旄乘塞祿非授進寵是宸衷久侍玉階四掌綸誥
一心好直三黜其宜今復用之猶夫人也何足以舉明
邦政光緝帝猷更策疲驂來塵法駕又臣已受命司籍
專意簡書所希散冗因閒就業忽叨劇職責大憂深人
心有限事難兩濟國史無成臣執其罪上思薦賢以自
代下願守分以全節竊見開府宋璟清介獨立倚法而

不回魯事陸象先清明向道臨事能斷其高明有素歷朝之所仗委其積行無疵眾人之所體信揆停住任未盡宿誠乞迴此恩以納來效必能補舊政之缺漏廣前途之軌轍雖深心用力臣頗與二子齊驅然校德考年彼皆有一日之長天下者累聖之公器宰相者萬方之具瞻臣所以廷讓彰言不陳密啟伏願聖恩聽輿論而舉眾望所矚倘朝任得人實海內幸甚無任力微任重惶懼之至謹奉表陳讓

讓封燕國公表

臣說言伏奉今月七日制書封臣燕國公食封三百戶寵靈猥及中心如憺臣說中謝臣聞至道之時重法守義

上無無功之賞下無無德之祿故授受禮全而踰越不起伏惟陛下光撫宇內大雷天域百度維新萬靈翹注建侯疏壤允答元功臣亦何人首膺是命自古有道而爵說經而封蓋以訓蒙成聖資師通學臣之侍講有異前聞何者大明朝昇蜚燭無助時雨夕濡浸灌焉施幸得依附光景游泳渥澤豈敢虛承啟發之恩謬荷將就之報且如人臣之義二則爲罪一心不回愚知之分譬如犬馬有不背之性草木有不彫之理知何德於天壤而欲蒙造化之偏施哉臣之無功正與此類叨恩過量終懼且慙乞迴聖慈以容介節無任惶悚之至謹詣朝堂奉表陳讓以聞

讓中書侍郎表

臣說言伏奉制書除臣中書侍郎寵命俯臨驚魂自失
臣說中謝臣聞雲構鬱起非枳棘之任天波暴集甯溝洿
所容臣識無通方文不經國南宮華省已忝前行西垣
內閣將陪近侍心慙官謗跡愧時流何以承掌主言贊
決機務當今二儀再造百度皆新太平之基惟賢是與
混成庶政責在中書豈以常才敢膺首選乞履恩命改
擇時髦惟慎庶官以諧僉議無任惓款之至謹詣朝堂
奉表陳讓以聞臣所讓人別狀封進

讓右丞相表

臣說言伏奉制書除臣右丞相兼中書令臣學慚稽古

早侍春官階緣舊恩忝竊樞近雖思致君堯舜而才謝
伊臯屬升中大封方求俊乂猥升端右實愧朝行乞停
新令獲守舊職辭納情懇希垂鑒諒無任屏營之至謹
奉表陳讓以聞

第二表

臣說言伏奉今月十日制書除臣尙書右丞相恩命自
天戰跼無地臣說中謝臣少長儒門墾鑿墳史才非高格
官不因人徒以命偶龍興位階鴻漸五入西掖七踐南
宮中間拙延謫放直招玷缺傷矢之禽聞弦虛墜賜環
之客聽歌先泣此則魂爲危感氣由懼奪安可重收廢
器再辱端揆何以師長禮闈正持憲府當今典章革故

風教鼎新野無四隱朝有三傑具瞻之地願擇時髦臣
幸沐遺簪墮履之恩好生養志之德朝遊簡牘暮對圖
書受賜無涯循榮過分豈更於處士之橫議招匈奴之
遙哂艾骨自瘡負乘致寇雖則愚情懷戀覲冒求寵亦
望聖慈限約令度餘年願停今授長守舊史罄陳肝膽
非敢飾讓謹詣朝堂奉表自乞臣說誠惶誠恐頓首頓
首死罪死罪謹言

讓中書令表

臣說言伏奉今月十一日制授臣中書令恩渥自天震
越無地臣說中謝伏惟陛下至孝安親大功定國六合翹
首庶政維新雍熙之化望在茲日中書理本臣叨首名

將何以翊贊聖君光澤天下自臣攝官禁掖已涉七旬
不知賢才以舉是不仁也不辯不肖以退是無勇也何
足以備乎宰臣胡顏冒恩復受眞拜臣之愚執正在於
此不敢繁詞以塵聖聽乞迴榮授改擇時髦無任懇款
之至謹詣朝堂奉表陳讓以聞臣所讓人別狀封進

讓平章事表

臣說言臣伏奉宣旨制書以臣同中書門下平章事承
命戰汗拜舞失容臣說誠惶誠恐頓首頓首死罪死罪
臣本書生器識凡近仕不望於通貴祿只宜於代耕蒙
時寵榮越踐臺閣局心守職竊所庶幾長算經邦則無
逮及伏以廟堂寄切軍國務殷循涯審分非臣攸處爲

國者爲官擇人爲臣者陳力就列若志小謀大方微任重豈敢顧惜微軀實恐上塵王政是以披露肝膽不暇飾詞乞停此授俯遂誠情無任怖懼慙惶之至謹詣朝堂奉表陳讓以聞

讓起復除黃門侍郎表

草土臣說言臣私門凶咎喪紀未終不自毀滅苟存聖代忽降制書復臣工部侍郎尋奉後命授臣黃門侍郎震駭失圖哀怖殞絕臣說誠惶誠恐頓首頓首死罪死罪臣弱年早孤母氏訓立得紹基構忝列簪裾從官歷年晨昏多闕播遷遠裔離別又苦顧復無答報養何追心所摧感語不能喻甫至冬中禮及祥禫今已春暮瞻

言幾何是臣事朝廷日長戀几筵日短乞寢嚴命許達
私情訴衷祈天所望矜遂無任荒迫之至謹詣朝堂路
左奉表乞哀以聞謹言

第二表

草土臣說言臣在疚承榮布哀陳款精誠無感天睠未
回假喘殘生悲懼轉集臣說誠惶誠恐頓首頓首死罪
死罪臣聞苦者不覺聲哀窮者貴其言達情有至切辭
無敢隱臣爲少子愛慈所鍾每一離別輒加憂憫況臣
生年多故違隔私庭終堂之日身限公事存旣數違左
右沒復不畢几筵痛心自傷特殊人類臣今望延數月
企及再期乞恩無多報國非晚冒死重請冀蒙哀遂無

任懇迫之至謹詣朝堂路左奉表陳乞以聞

第三表

草土臣說言臣荒喘窮情再瀆旒宸懇誠不到未感天心誓將冒死祈恩分外謝臣本書生門非代祿數葉單緒族無親房臣父遭憂曾祖未葬臣有兩兄一妹甥姪九人又有中表相依尙成百口吉凶衣食待臣以辦臣今拜職黃閣侍奉丹墀厚祿清班一朝改官舉宗榮賴爲幸過甚人情所欲豈合稽恩正以兢兢苦心有所未盡臣亡母在日朝夕誠臣以臣獨立無徒好直多忤知子者母果驗所言往懼大獄竄命炎海晨出晚歸貽慮非一況涉危難傷心幾途追計生平倍增摧慕侍養日

少違離日多卽臣母憂臣以終身臣其忍服縗以從事
情旣不同常例望在特降殊恩臣先患風緩近加虛痺
陛下倘從臣數月容過再期非但寬其哀疚固亦全其
生理亡身報國庶竭後圖木植有性枉之則折人願在
心違之則苦雖強爲用將何以堪銜泣仰天冀蒙哀允
無任懇迫之至謹詣朝堂路左奉表陳乞以聞

謝觀唐昌公主花燭表

臣說言內侍尹鳳祥宣敕賜臣觀唐昌公主花燭伏以
天人下嫁王宰送行苟非榮寵何階瞻望臣免歸餘叟
忽承朝請之恩廢駕羸驂復覩肅雝之禮鴻私所被枯
瘁生光無任歡荷之至謹奉表陳謝以聞

諫內宴至夜表

臣聞上天示下災祥將以誘導人主先王仰觀休咎亦以順修政教易曰天垂象聖人則之言天人之際感通必矣臣伏見去年十月十七日月滿猶墜應虧不虧今月十七日亦未少虧此易常之異也夫月者至陰之氣臣下之象當助天作明順期盈缺若過盛逾時盈縮乖度得非臣下之咎而上天之誠耶伏願陛下深察熟思而預防臣又見近日內宴夜深方罷小臣無識抑所未安王在在鎬凱樂飲酒此誠大雅之美也臣卜其晝未卜其夜此蓋春秋之義也伏願陛下宴樂之餘不及於夜臣職忝補缺昧死陳愚謹言

進鬪羊表

臣說言臣聞勇士冠雞武夫戴鶡推情舉類獲此鬪羊
遠生越雋蓄情剛決敵不避強戰不顧死雖爲微物志
不可挫伏惟陛下遷良家於六郡求猛士於四方烏無
遁材獸不藏技如蒙效奇靈圍角力天場卻鼓怒以作
氣旋躑躅以奮擊跌若奔雲之交觸碎如轉石之相叩
裂骨賭勝濺血爭雄敢毅見而衝冠鷲很聞而擊節冀
將少助明主市駿骨揖怒蛙之意也若使羊能言必將
曰苦鬪不解立有死者所賴至仁無殘量力取勸焉臣
緣損足未堪履地謹遣男駙馬都尉埒謹詣金闕門陳
進輕冒宸嚴伏深戰越

進佛像表

臣說言去年行塞至朔州忍辱尼寺見有高祖太宗造金像銀趺刻題尊號彼州士女屢瞻佛光臣懇思聖心如在咫尺伏以皇帝事業遠存荒塞拯溺救焚身勤慮苦歸誠佛寶何神不據信知功徧區域澤周生人心憑神靈躬履危險故皇天眷命奄有邦家後嗣聖人欽承大寶所當思由積德而興帝系本艱難而成王業先聖一心奉佛者蓋爲百姓求福也陛下爲繼文之主實創業之功再廓氛祲重安廟社垂統萬億同符祖宗夫惟興王必藉佐命咸有一德克享天心書曰非天私我有商惟天佑於一德非商求於下民惟民歸於一德功臣

同德可不念哉物有小而感深事有微而傳遠臣謹將
金像隨表奉進謹言

進渾儀表

臣說言臣聞迎日授時莫先於^麻象先天成務必歸於
制作伏惟開元神武皇帝陛下建中立極緯武經文至
德難名神功莫測於是定^麻成歲立象考天紹唐堯欽
若之文繼虞舜在璿之義上皇能事於斯備矣臣書院
先奉敕造游儀以測七曜盈縮去年六月造畢進奏又
奉恩旨更立渾儀臣等准敕令左衛率府長史梁令瓚
檢校創造於是博考傳記舊有張衡陸績王蕃錢樂之
等並造斯器雖渾體有象而不能運行事非經久旋卽

毀廢臣今按據典故鑄銅爲儀圓以象天使得俯察上
具列宿赤道周天度數注水激輪令其自運一日一夜
天轉一周又別立二周輪絡於天外綴以日月令得運
行每天轉一匝日行一度月行十三度十九分度之七
凡二十九轉有餘而日月會三百六十五轉而行匝仍
置水櫃以爲地平令儀半在地上半在地下晦朔弦望
不差毫髮又立二木人於地平之上前置鐘鼓以候辰
刻每一刻則自然擊鼓每一辰則自然撞鐘皆於櫃中
各施輪軸鉤鍵交錯關鎖相持轉運雖同而遲速各異
周而復始循環不息陰陽不能逃其數度分不能隱其
時究天地之回斡極乾坤之變化斯皆上稟聖謨旁獲

神助臣等愚思非所能及望錄付史館宣示百寮使知告成之功迴越前古無任勤懇之至謹隨表奉進以聞臣說誠惶誠懼

幽州論戎事表

臣說言伏以先帝以臣踐履忠孝使臣啟發聖明故得侍讀春闈夙承天眷泊於中歲兼掌樞密內當沸騰之口外禦傾奪之勢陛下監撫旣安自天所佑然臣叶贊之意神明啟之開元之始首典鈞軸智小任大福過災生出守三州遠離六載曲直非己升降由人惟君知臣事不待說今旣牧邊鎮委重戎麾竊以兩蕃共和能識同異九姓遠聞撫納欲恃賊殺無侵擾之慮保兩蕃受

徵發之期臣愚料之恐未然矣何者賊殺新立必逞兵所加必收九期若去兩蕃搖失九姓雖屬并州節度然其幽州密邇脫有風塵何所不至臣熟聞幽州兵馬寡弱卒欲排比未可卽用城中倉糧全無貯積事未逼迫臣實憂之伏乞聖慈深以垂意博詢舊將豫爲籌畫事若早圖必無後悔且孤臣總眾易起猜嫌寬大失濟事之宜嚴整招怨贖之謗遠辭天聽臨事回惶如有論告臣身奏劾軍事者乞追臣面問對定實虛則日月無可蔽之明幽遠有自通之望伏乞留書在內時加矜察

并州論邊事表

臣說言臣說頓首死罪死罪言臣聞小忿不忍延起大

患小罪不寬迫成大禍契丹奚背恩誠負天地不容之責然原其狀本是兩蕃君臣不和自相誅戮耳伏望聖慈且使其族類在朝者將敕書再三告讓因其所欲立酋長而更定之或可不戰而定也必告之不訓則大發兵馬東召靺鞨西舉九姓來春未青數道齊入單于之首可拾而取未爲晚也天恩若不忍以中國勞事蠻夷則嚴兵備塞棄兩蕃如糞土耳又許欽淡擁二萬餘兵據五丈之城有糧卽守不可拔無糧卽鼓而行何所慮也今遣史獻非時遠鈔近掠其實甚難萬一未捷賊氣轉壯下臣愚昧不敢隱情伏望聖恩再加裁度臣說誠惶誠恐頓首頓首

謝修史表

臣某言伏奉今月十六日敕令臣在家修史捧恩戴命且喜且慚臣服道儒門策名昌運掌綸四后載筆三朝階緣宿遇登躡端揆職爲劇於心盡史無用而功廢自貽官謗待罪私門反魯之感徒深藏周之望已絕豈意特流天旨重緝簡書雖才慚左邱而時盛周漢况復編堯舜之年事皆目覩敘羲黃之德言匪傳聞善志將訓於百王實錄可貽於千古國家之鴻業辦矣朽臣之至願畢矣不勝天恩難任之至謹奉表附內侍尹鳳祥陳謝以聞

謝賜碑額表

臣說言伏奉今日恩旨賜先臣碑額悲荷交心拜捧以

泣臣某

中謝

臣亡父先臣騰安貞下位不待昌辰先帝贈

之以帑城陛下目之以積善光賁重渥感慶三泉舉宗
悲喜外姻歡賀昔孔篆吳札之墳秦存展季之壟事輕
列國義小陪臣豈若天王禮士鳳書旌墓榮軼曩賢道
映來籍在臣在子移孝爲忠心效草木何酬雨露無任
幽明感戴之至謹奉表陳謝以聞

謝京城東亭子宴送表

臣某言力上至奉宣勅以臣臨歧特令賜宴恭承惠渥
念及庸微天地同仁木石知感不勝惶悚戴荷之極臣
某中謝臣歷觀自古君臣凡所際會或因緣黨進或延接

功成故未竭而知不言而信豈有地孤援寡毀眾謗深
察蒙蔽之中致曠蕩之外逢陛下特達之遇當陛下聖
明之朝事出非常澤深恩重今者誓將瀝血未足竭誠
徒欲殺身豈能報德至如勵精勤政與直守公酌陛下
憂人之心行陛下宏道之化安敢失墜以負神明但函
關路遙長安日遠不任戀主悽愴之至

謝賜鍾馗及_(麻)日表

臣某言中使至奉宣聖旨賜畫鍾馗一及新_(麻)日一軸
者猥降王人俯臨私室榮鍾睿澤寵被恩輝臣某_中謝臣
伏以星紀迴天陽和應律萬國仰維新之慶九霄垂湛
露之恩爰及下臣亦承殊賜屏祛羣厲續神像以無邪

允授人時頌麻日而敬授臣性惟愚懦才與職乖特蒙
聖慈委以信任既負叨榮之責亦懷非據之憂積愧心
顏難勝惕厲豈謂光迴蓬華念等勳賢慶賜之榮賤微
常及感深犬馬戴重邱山無任感荷之至

荊州謝上表

臣某言伏奉二月二十五日制書除臣荊州大都督府
長史拜命荒服浮舟適沂以今月十七日到州上訖山
列楚望水橫南紀德非羊祜迹謝朓均何以鎮靜流亡
攘除猛暴臣某中謝臣宿濫宸睠累塵榮獎福過生災至
剛多缺及一辭庭闕已涉五年不有自白之書竟無因
人之請天光獨照雲霧頓披窮鱗更隱仍窮揣分

瞻恩何階及此愧乏才能不足宣暢皇風敢竭心力少
冀上酌元造無任欣忭兢惕之至謹附送丁宗資使所
部文林郎守公安縣主簿封希魯奉表陳謝以聞

謝問表

元宗

臣說言內給事高力士至伏奉墨制聖慈綢繆言及舊
昔拜舞捧讀且驚且喜臣聞漢主眷駢乘之臣魏君憶
同遊之客誠以故舊不棄而光陰易往今之聖情實過
於昔臣曩蒙侍文北閣陪宴東堂庭闕一遙寒暄二載
不意逢春之草承清露之惠渥容光之隙引遲日之暉
華無任荷恩戀主之至謹附高力士奉表陳謝以聞

謝賜藥表

臣某言去年某月日於右銀臺門蒙天恩引對特承慰問攝理無方以致熱疾緣在假內不敢奏聞聖慈憂軫詔使臨門伏枕在牀雖體氣未適趨風拜命覺腠理遂平恩榮豈止於邱山朽質永延於龜鶴無任感戴之至謹奉表陳謝以聞

岳州刺史謝上表

臣說言伏奉四月十有二日制書除臣岳州刺史某月二十七日遞書到相州承恩惶怖狼狽上道以月一日至岳州上訖臣以昔侍金華過蒙榮寵負乘招寇日待譴黜聖慈遲迴仍委符守刻肌刻骨誠願上報恩私無術無才將何克宣風化夙夜慚惕胡甯敢處伏以貶官

到任理在速聞不敢循常稽緩附使無任荷恩兢懼之
至謹遞表陳謝以聞

張說之文集補遺卷第一

張說之文集補遺卷第二

疏 狀 對策 批答

諫避暑三陽宮疏

諫潑寒戲疏

論神兵軍大總管功狀賀彩雲見狀

賀破吐蕃狀

謝賜羅絹狀

集賢院謝示道經狀

謝賜御書碑額狀

謝賜藥狀

對策 三道

答宰臣賀破賊狀

諫避暑三陽宮疏

陛下屯萬乘幸離宮暑退涼歸未降還旨愚臣固陋恐
非良策請爲陛下陳其不可三陽宮去洛城一百六十

里有伊水之隔，嶒坂之峻，過夏涉秋，水潦方積，道壞山險，不通轉運，河廣無梁，咫尺千里，扈從兵馬，日費支給，連雨彌旬，卽難周濟，陛下太倉武庫，並在都邑，紅粟利器，蘊若山邱，奈何去宗廟之上，都安山谷之僻處，是猶倒持劔戟，示人罇柄，臣竊爲陛下不取夫禍變之生，在人所忽，故曰安樂必誠，無行所悔，此不可止之理一也。宮城褊小，萬方輻輳，填城溢郭，併錡無所排斥，居人蓬宿，草次風雨，暴至不知庇託，孤嫠老病，流轉衢巷，陛下作人父母，將若之何，此不可止之理二也。池亭奇巧，誘掖上心，削巒起觀，竭流漲海，俯貫地脈，仰出雲路，易山川之氣，奪農桑之土，延木石，運斧斤，山谷連聲，春夏不

輟勸陛下作此者豈正人耶詩云人亦勞止汔可小康此不可止之理三也御苑東西二十里所出入往來雜人甚多外無牆垣禁籞內有榛叢谿谷猛獸所伏暴慝是憑陛下往往輕行警蹕不肅厯蒙密乘嶮巖卒然有逸獸狂夫驚犯左右豈不殆哉雖萬全無疑然人主之動不宜易也易曰思患豫防願陛下爲萬姓持重此不可止之理四也今國家北有外寇觀邊南有夷獠騷徼關西小旱耕稼是憂安東近平輸漕方始臣願陛下及時旋軫深居上京息人以展農修德以來遠罷不急之役省無用之費澄心澹懷惟億萬年蒼蒼羣生莫不幸甚臣自度芻議十不一從何者沮盤遊之娛間林沚之

引和
玩規遠圖而替近適要後利而棄前歡未沃明主之心
已戾貴臣之意然臣血誠密奏而不愛死者不願負陛
下言責之職耳輕觸天威伏地待罪

諫潑寒戲疏

臣聞韓宣適魯見周禮而歎孔子會齊數倡優之罪列
國如此況天朝乎今外蕃請和選使朝謁所望接以禮
樂示以兵威雖曰戎夷不可輕易焉知無駒支之辯由
余之賢哉且潑寒胡未聞典故裸體跣足盛德何觀擇
水投泥失容斯甚法殊魯禮褻比齊優恐非干羽柔遠
之義樽俎折衝之禮

狀

論神兵軍大總管功狀

右牒奉敕責聞大總管功狀者自契丹背恩營州失守前軍喪律榆關不開幽平烏栖於重壘戎羯虎食於四野燕南諸城十僅存一河朔之地人挾兩端由是豺狼入於牢竄蜂蠆出於懷袖受服不宿孤劔先驅寇讐日深甲兵未繼于時鳩合步騎不滿三千彼眾我寡兵怯虜熾且保關守塞力猶不禦況土人弄兵轉相攻拔外召夷狄內據險隘冀州既陷勢將不已當決水之衝承烈火之燄逆風撲燎摧岸塞河韓白見之知其難矣王權以料敵靜而鎮下宣國恩以撫甯曉愚俗以逆順督將吏以忠義示士伍以嚴肅深籌祕於六奇潛檄通於

千里滄瀛貝博響援增氣幽易恆定聲威有立而又分
兵井陘杜其西望引軍河漕阻此上流張虛旗於趙城
設奇兵於襄國亦猶夫吳人潛軍於巢縣而見舟豫章
漢將捷徑於武關而聲出峭澗蓋廣援以安眾多方以
誤敵故能舉無遺策兵不踰時滌昂宿於妖氛拔冀方
於塗炭俾皇靈溥暢黔首昭蘇朝廷釋東顧之憂漳滏
息南侵之患然後歸剽掠返流亡業窮乏振痍傷僵暴
皆掩死喪無怨賞不失勞亦無濫受罰不漏罪亦無冤
人則王有大勳於是役也而又誠以奉上義以利人至
忠之狀有三爲善之跡有五所謂忠者一曰思致命也
初戎寇方殷王乘駟救眾纜數騎捍敵羣醜山東父老

如恃山河旣而王躬環甲胄吐誠師旅誓在盡敵以報前讐故得感激來戰決命爭勝二曰能果斷也凶黨狂狡飛轉妖書吠堯謗舜間誘愚惑事斯蔓結搖我人心王陰察州閭揜求魁蠹獲應賊書人耿羅漢等一十三人焚書伏罪眾而後定故得破謀殺諜悖計無施三曰誠感神也王地維近屬躬當大任所過山川鬼神之地罔不精意懇禱以請云天子聖明皇天輔德實降靈助以濟神兵幽感明祇多獲孚佑故得行師之處勝風送旗合戰之時興雲翊陣金鼓所向冰消草靡所謂善者一曰均下也飲食勞逸與將士必同二曰潔己也徧賞有功王秋毫無受三曰詢善也國之彝典成誦在心閱

實定名必資羣議四曰嫉惡也每戮一人親數其罪必
深加咎責使愧恥於地五曰不伐也賊平之日將吏賀
功王稱美天威推勞士眾兢兢然若不己有也惟聖人
神武制命預授兵符惟大總管忠善龔行克成廟算今
者顯號年紀騰輝國籍方謂垂範雲臺勒休彝器而杖
杜遣宴甫率於舊章茅土增封殊末於宗正此壯夫義
士所以竊議而長歎者也雖樹下不言用歸功於明主
然策勳有典何勸善於戎臣敢憑下問是用大陳其所
正復州縣招撫歸降補署官僚存集流迸擒殺凶醜收
獲軍實與吏士共功者俱如別狀

賀彩雲見狀

右伏奉恩旨今日屬下元賜臣等侍從升降聖闕禮謁
大聖尊容行香之際日西南有彩雲見者伏以大道無
形至誠斯應上元降福感而遂通步輦陟於齋宮虔修
香火彩雲生於曉日遽發祥光是知聖德與天心合符
萬靈與羣仙叶贊臣叨陪侍從如昇汗漫之遊承恩禮
謁更觀氤氳之瑞榮幸之極千載一時無任欣慶之至

賀破吐蕃狀

右臣等伏以涼州遙稟神算大振天威吐蕃小醜應時
摧敗元惡渠魁乘勢俘戮隻輪匹馬坐見無遺雖虞舜
之格有苗黃軒之征涿鹿未有廓清氛祲如今日之盛
者臣等無任慶快之至

謝賜撰鄭國夫人碑羅絹狀

右內侍尹鳳祥宣口敕得所進鬪羊表及鄭國夫人碑
今賜卿綵羅二十四匹絹一千匹鬪羊薄技恩感戰士之
心雕蟲陋詞愧稱賢母之德效輕賞重戴厚慚深臣子
之情豈望天報

集賢院謝示道經狀

右臣伏見聖札金字八分寫道經兩卷以爲惠文太子
三七追福天毫發彩宸翰騰輝色麗風雲光逾日月伏
惟陛下孝弟之至通於神明俯念天倫用資幽贊當茲
炎暑服此勤勞事絕古今感深名教臣忝司舊職載考
前王未有親親之至楷隸之美如此之備也足以作則

貽範垂之無窮伏望宣付史館以光典策無任誠懇慙惶之至

謝賜御書大通禪師碑額狀

右內侍尹鳳祥宣示御書大通禪師碑額六字畫起平雲點蹲芒玉戈矛攢倚鸞鶴交飛神功發於至想睿思成於玄德實謂天龍捧持虛空稱贊逝者如在薦福知歸臣棲志禪門撰碑靈塔幸遇聖情崇道御書假貸刻星辰於嘉石爛日月於封邱感極悲生恩深無答臣無任望外殊澤之至

謝賜藥狀

右內史陳忠盛宣旨賜臣痢藥臣攝生無方自貽疾疢

聖慈矜憫垂恩救護氣衰力憊忽吞永命之符腸滑胃
虛更餌返魂之草蒙天營祐指日痊平雖萬粉灰何酬
造化謹附忠盛奉狀陳謝以聞

對策

詞標文苑科策

第一道

臣聞舜命昌言漢徵極諫嘗覽千古賢哉二君今陛下
發德音下明制選空岩穴訪匝輿臺大哉邈乎過之遠
矣臣以草莽之賤謬當車乘之招誠不足以庶幾王庭
充塞大問伏讀聖旨乃知天心之所存焉臣聞昔者鳥
跡代繩龍文演卦水土遷王時更萬祀金木互興人非

一姓暨乎三皇五帝氏往夏商周漢氏作或導人以禮樂或驅俗以政刑或革弊以忠敬或治風以文武非師古之誥有殊蓋隨時之義且異也伏惟聖母神皇陛下誕受鴻基光膺駿命粵若立極格天之業論道布政之典任賢克暴之功出洛卿雲之瑞此并藏緯玉冊勒休金版鬱美前古揚光後葉者矣至若創業垂統之則宏猷永圖之美重光三聖再清六合可不謂然乎猶或惕慮推溝勞謙馭朽謝文明於薄德想疇庸於清問此陛下之至讓也愚臣何足以知之策曰適時之務何先經國之圖何最臣聞古者因人以立法乘時以設教以義制事以禮制心夫人者理得則氣和業安則心固崇讓

則不競知恥則遠刑若強人之所不能雖令不勸禁人
之所必犯雖罰且違故曰政不欲煩煩則數改數改無
定人懷苟免之心網不欲密密則深文深文多傷下有
非辜之懼竊見今之俗吏或匪正人以刻爲明以苛爲
察以剝下爲利以附上爲誠綜覈之司考課專於刀筆
撫字之宰職務具爲簿書陛下日昃雖勤守宰風化多
闕臣以爲將行美政必先擇人失政謂之虐人失人謂
之傷政捨人爲政雖勤何爲伏願陛下進經術之士退
掇克之臣崇簡易之化流愷悌之風畫一成歌此適時
之務也慎賢而用此經國之圖也苟能英才不棄大化
方隆而猶曰朝謝垂衣野非擊壤則文武之道尙何言

哉堯舜之君徒虛語耳策曰帝皇之道奚是王霸之理
奚非者布在方策臣聞之矣聖人御麻上道而下信帝
者應期君明而臣哲周用王道教化一人而人從漢雜霸
政刑政嚴而俗僞故親譽優於畏侮文章劣於成康臣
謹對

第二道

臣聞刑以助教德以閑邪先王慎於好生大易誠於緩
死今陛下母臨黔首子育蒼生孚佑下人克配上帝然
自東南小祲荆蠻遠郊雖聖德泣辜尙用防風之戮天
心罪己仍勞淮甸之征其有註誤閭閻脅從井邑陛下
愍孤霜於海淮恤困窮於江漢捨從寬宥此陛下之恩

也而蕞爾餘孽蠢茲頑兇思弄兵於潢池之下將構難於戎狄之域罪盈稔貫禍得萌芽此又陛下之明也今陛下乃賜臣策曰豈止殺之方乖於折衷將小慈之澤爽彼大猷臣實見折衷大猷之規不知小乖微爽之義也策曰刑政之要實所明閑臣聞政猶水火刑譬陰陽頃者三監亂常有司既糾之以猛於今四罪咸服陛下宜濟之以寬明肆赦之渥恩安萬人之反側布深仁於羅烏收至察於泉魚豈不大哉天下幸甚且夫人者眈也暗而不可罔庶者眾也愚而不可欺是故刑在必澄不在必慘政在必信不在必苛故明王之理天下也刑一則人畏而不干政簡則俗齊而不僞於是禍亂不作

災害不生君安於上臣悅於下百姓日用而不知其然四海風動惟帝之則道暢鍾石聲流舞詠其行己也非他所理者以此刑政之要庶幾一隅臣謹對

第三道

伏惟陛下則天法地畏命重人據河洛之規模總風雨之交會軒后魚圖之水建邦設都周公龜墨之地考堂作室靈祇降福嘉祥薦祉制同神造力以子來將以殷薦上帝至法也嚴配先王至孝也加以八風攸序四時克諧無得而稱能事畢矣猶復執勞謙之不已懼盛禮之未宏訪末學之臣詢稽古之政斯事體大臣何足言然而敢不欽承以竭涓滴耶策曰何代之政參詳適中

何禮之規施用爲切臣謹錯綜三五明徵典謨竊以緯武經文布方策而非遠英風顯號流頌聲而可襲未有反義悖德而致昇平之政棄禮違經克以永終之祿莫不發號施令法乾坤之動靜執契縣衡順金木之刑政是故青陽玄室遵孟仲而觀風白輅朱旂因離光而布政養老用上庠之禮教胄取太學之義環水著辟雍之名向陽表明堂之位蓋所以享羣瑞朝諸侯頌正朔調景緯成簡易之基崇久大之業也皇王輿旨庶此詳探周漢前蹤難於專用臣才智駑劣草莽鯁生至如軍國務廣政刑理急但至敬無文信言不美陛下欲聽其說必觀于事將達其謀先求諸道危言抵禁破膽寒心伏

惟聖主稍留天聽臣謹對

批答

答宰臣賀破賊狀

省表具知蠢茲戎狄侵軼邊鄙不交鋒刃自取敗亡既
邊將之功亦天道所棄心之有慰與卿同之

張說之文集補遺卷第二

張說之文集補遺卷第三

序 啟 書

大衍麻序

唐昭容上官氏文集序

孔補闕集序

洛州張司馬集序

先天醮宴序

尋花柳宴序

饒韋侍郎神都留守序送弟赴定州詩序

送毛明府詩序 曾諸友詩序

上東宮請講學啟 與執政書

與鄭駙馬書

大衍麻序

特進集賢院學士修國史上柱國燕國公臣說言麻者

先王以明時授人敬天育物者也辰極恆居斗運不息
晦朔相推而變月寒暑往來而成歲日月右轉周天之
度啟星辰左旋正時之氣合積餘分而置閏配甲子而
設部鳳鳥爲司疇人受職分分而加之者百鈞必過毫
毫而減之者千里必差何則古法存而其人異也不有
大聖孰能起之伏惟開元神武皇帝陛下欽崇天道慎
徽月令受命再新改制創曆十有三祀詔沙門一行上
本軒頊夏殷周魯五王一侯之遺式下集太初至於麟
德二十三家之眾義比其異同課其疏密或前疑而後
定或始會而終乖振古未探之象必發揮於神算大鈞
不測之氣盡覩縷於天聰迺更審晷度之短長覈星閒

之廣狹繩九道之臆胸糾五精之進退參大衍天地之
數綜八卦六爻之序一轍於文王也覈春秋交蝕之辰
研九疇五紀之奧同文於孔子也杼軸萬象優柔四載
奏章朝竟一公夕落臣說奉詔金門成書冊府先有理
麻陳景善算起昇首尾參元之言接承轉籌之意因而
會輯編次勒成一部名曰開元大衍麻經七章一卷長
麻三卷麻議十卷立成法十二卷天竺九執麻一卷古
今麻書二十四卷略例奏章一卷凡五十二卷所以貫
三才周萬物窮數術先鬼神稱著曰者卽聖人顧訪之
旨標謹按者是麻家進對之辭非軒后至聖不啟履端
之業非容成詣極不就歸餘之經據其圖也七政之天

心不遠守其術也千歲之日月可知蓋中黃之寶符太
紫之神器者也謹以十六年五月端午赤光照室之夜
皇雄成紀之辰當一元之出符獻萬壽之新曆伏望藏
之書殿錄於紀言掌之太史頒於司曆制曰可

唐昭容上官氏文集序

臣聞七聲無主律呂綜其和五采無章黼黻交其麗是
知氣有壹鬱非巧辭莫之通形有萬變非工文莫之寫
先王以是經天地究人神闡寂寞鑿幽昧文之辭義大
矣哉上官昭容者故中書侍郎儀之孫也明淑挺生才
華絕代敏識聰聽探微鏡理開卷海納宛若前聞搖筆
雲飛咸同夙構初沛國夫人之方娠也夢巨人俾之大

秤曰以是秤量天下及昭容既生彌月夫人弄之曰秤
量天下豈在子乎孩遂啞啞應之曰是生而能言蓋爲
靈也越在襁褓入於掖庭天實啟之故毀家而資國運
將興也故成德而受任自則天久視之後中宗景龍之
際十數年閒六合清謐內峻圖書之府外闢修文之館
搜英獵俊野無遺才右職以精學爲先大臣以無文爲
恥每豫遊宮觀行幸河山白雲起而帝歌翠華飛而臣
賦雅頌之盛與三代同風豈惟聖后之好文亦云與主
之協贊者也古者有女史記功書過復有女尙書決事
宮閣昭容兩朝專美一日萬幾顧問不遺應接如響雖
漢稱班媛晉舉左嬪文章之道不殊輔佐之功則異迹

祕九天之上身沒重泉之下嘉猷令範代罕得聞庶姬
 後學嗚呼何仰然而大君據四海之圖懸百靈之命喜
 則九圍挾纘怒則千里流血靜則黔黎又安動則蒼毗
 罷弊入耳之語諒其難乎貴而勢大者疑賤而禮絕者
 隔近而言輕者忽遠而意忠者忤惟窈窕柔曼誘掖善
 心忘味九德之衢傾情六藝之圃故登崑巡海之意寢
 翦胡刈越之威息璿臺珍服之態消從禽嗜酒之端廢
 獨使溫柔之教漸於生人風雅之聲流於末葉非夫^①
 黃毓粹貞明助思眾妙扶識羣靈挾志誕異人之寶授
 興王之瑞其孰能臻斯懿乎鎮國太平公主道高帝妹
 才重天人昔嘗共遊東辟同宴北渚倏往忽來物在人

亡憫雕瑄之殘言悲素扇之空篋上聞天子求椒掖之
故事有命史臣敘蘭臺之新集凡若干卷列之如左

孔補闕集序

唐會稽孔季翊字季和識真之士也弱冠制舉授校書
郎轉國子主簿年三十一卒於左補闕祖紹安中書舍
人考楨絳州刺史季和清規素業有奕代之訓依仁游
藝其聖者之後永昌之始接迹書坊有廣漢陳子昂鉅
鹿魏知古高陽許望信都杜澄昌樂谷倚廣陵馬懷素
東萊王無競河南元希聲臨淄李伯魚譙國桓彥範僉
謂季和神清韻遠析理探微衛叔寶之比也嗚呼人斯
云亡世闕多故十年之外零落將盡而後來者皆首華

金步鳴玉負璽丹地揮毫紫宸何嘗於拜職之日歎在
劉王喬臨壇之時恨無謝益壽者矣頃見許渺之子風
裁可觀潘子之門有尼夏侯之學傳建集作者五卷以
示子稱從弟四人皆良器槍相如之遺草幸公業之不
亡因敘曩意存之篇首云爾

洛州張司馬集序

夫言者志之所之文者物之相雜然則心不可蘊故發
揮以形容辭不可陋故錯綜以潤色萬象鼓舞入有名
之地五音繁雜出無聲之境非窮神體妙孰能與乎洛
州司馬張公名希元中山人也族高辰象氣壯山河神
作銅鉤天開金印孝友內植禮樂外滋勵行闡庭鄉人

謂之曾子飛名都邑諸儒號曰聖童下帷覃思穿牆嗜
古蓬山芸觀之書羣玉懸金之記魯宮藏篆汲冢遺編
無不日覽萬言暗藏三篋博學吞九流之要處盈若虛
雄辨敵四海之鋒退藏於密漢王問策知帝者之師楚
子聞名實諸侯之選故得雄飛白簡鷹揚丹筆卷襜帷
於天郡設鉤距於皇都若乃抗埋輪之章執驚馬之議
旌賢有通德之教疾惡存署背之文繼軌前途遇物成
興理關刑政咸歸故事之臺義涉箴規盡入名臣之奏
加以許與氣類交遊豪傑仕遘夷險身更否泰昔管攝
戎幽易謫居邛雋亭皋漫漫興去國之悲旗鼓洵洵助
從軍之樂時復江鶯遷谷隴鴈出雲夢上京之臺沼想

故山之風月發言而宮商應搖筆而綺繡飛逸勢孤標
奇情新拔靈仙變化星漢昭回感激精微混韶武於金
奏天然壯麗絳雲霞於玉樓當代名流翕然宗尙自大
夫之頌成室太史之賦京都魏則十龍儒雅晉則三陽
藻綴朝分南北運迄周隋文人才子重世閒出豈止枏
榴體物陳琳得以示人鷓鴣寄辭阮籍稱其王佐故以
開國籍鱗次乎史傳之首入文場羽儀乎天下之半公
增繁榮業桂林之一枝彌廣源流荆江之九派宗門多
士斯爲盛歟且如承家舊德之基賓王厯官之序玉瑄
銅渾之數黃公^⑤女之符落猿瘡兕之巧飲鵲迴鸞之
妙詳諸列傳可略言焉某宰邇蘭芬族聯棣萼荷千里

之嘉獎接四友之良遊謹撰令引式題前集七子賦詩
期取類於鄭志一家垂範庶齊衡於孔藁來日新文請
俟君子起儀鳳之後迄景龍以前凡若干卷列之於目

先天醮宴序

先天元祀孟冬十月東都留守韋公寅奉聖朝述宣嘉
旨乃合洛京之五省招河伊之二縣將吏咸集佩章有
序鏘鏘濟濟侃侃闐闐供張於興教之門式醮宴也原
夫樂生於心非因清風之奏和達於氣無待陽春之節
蓋澤之所及也深則情之所感者遠國家天地一統君
臣百年朝榮舊德之緒野服先疇之業元化漸漬洪恩
既久太上功德不宰夏后命子之初皇帝孝理無爲漢

祖事親之日生堯舜於天屬見文武之同時前古未逢
斯人何幸是日六樂振作萬舞苒弱鳥獸徘徊士女踴
躍則知眾庶觀聽之所樂也旨酒絡繹大庖燔炙芳溢
風煙醉流阡陌則知衣冠酣暢之所適也由近而視遠
萬國之慶皆然自明而察幽三靈之歡可接若夫吟詠
德澤播越仁聲斯固雅頌之餘風政教之遺美凡我詞
客安敢闕如賦詩展事垂列於後

南省就竇尙書山亭尋花柳宴序

尋花柳者上賜羣臣之宴也大哉春氣同夫聖心無物
不榮有情咸達況乃五教敷洽萬邦懷和尉侯警而莫
犯刑法存而不用歷觀近古此遇良難諸公入金門侍

瑤殿窈窕雲閣葳蕤華館不亦泰乎然王事靡盬夙夜
在公接良會於愷澤散煩襟於清曠不亦優乎爾其嘉
賓爰集勝賞斯備召絲竹於伶官借池亭於貴里雕俎
在席金羈駐門遠山片雲隔層城而助興繁鶯芳樹繞
高臺而其樂旨酒未缺方塘半陰盍陳旣醉之詩以永
太平之日

鄴公園池餞韋侍郎神都留守序

夫良才出乎休運大任歸乎令德四海旣安乃注意於
賢相兩都分正實具瞻於師尹鸞臺侍郎兼左庶子韋
公國之楨幹人之表儀矜嚴有叔子之容持重得楊公
之望門通禁省當朝稱累代之名管綜諸闈帖職盡一

時之美頃五星東聚八月西巡武王既入於鎬京君陳當往於洛邑中日昃之盈縮均天宇之會同清廟明堂政理之本也太倉武庫兵食之原也機務所總半天下之軍國聽訟實繁連海隅之郡縣恩有密而處遠事有疏而授親腹心遐寄惟賢是屬歲臨單闕月在長贏同蕭何之居守當陰識之留鎮北闕拜辭西堂宴餞大君垂藻承月露之光榮元良賜服被星海之耀潤執事以同列之好載壺酒而送行鄴公以彌甥之禮埽郊園而留別此地有離洲別嶼竹館荷亭曲沼環合而連注叢山相望而聞起幽隱長寂蕭條遠風通終南之雲氣下昆明之水烏爾其駐馬青林肆筵碧岸清管四發坐客

增悲高臺一望遊人忘返章公方祇率嘉命保釐成周
樹之風聲流我王澤然而臨觴不樂首途遲遲瑱闡夕
拜戀未央之宮闕錦服晝遊懷杜林之桑梓層城日下
高蓋雲飛天子賦詩已載寵行之史羣公盛集須傳出
宿之文凡若干首合成一卷陸生何幸暫游朝野之間
商也斐然輕述國風之序云爾

送工部尙書弟赴定州詩序

宵旰天子送冬卿之詩也河朔愆歲恆陽俟牧借威六
官導俗千里俾乎列城遷仰上之化鄰境蒙波及之澤
不然者豈一小郡而勞大賢哉尙書河東侯朝廷之舊
宰也操法度於掌握運陶鈞於方寸是將敷皇惠寒谷

挾纊而知暄暢君恩疲人飲德而自飽蘇其槁瘁樂我
陽和元宗殿國亦望於此於時春帶餘寒野銜殘雪太
官重味御酒百壺供帳臨歧假絲竹以留宴傾城出餞
會文章以寵行三台厚常察之意八座深聯事之矚旣
而離人遽起班馬爭嘶尋太行之連山想邯鄲之長陌
雖仰瞻鴻鴈來往易於前期而相對桑榆遲暮難於遠
別送歸之地歡悵如何應制華篇凡若干首騫翔鸞鳳
欲掛千金之木糾合蛟龍附藏羣玉之府置之懷袖以
慰遐心云爾

送毛明府詩序

昔之謂良宰者講道議行訓俗式人出自郎官遷登郡

守不以才限流品位遷寵賂聖^麻之際任賢稽古毛明
府執德不回發言無擇雍容文雅罷曲江之曳裾尊酒
絃歌卽羊卿之製錦甲朝辭洛宴別嘉賓孟夏涉河路
踐芳草眷彼燕趙頃罹戎寇金革毒三北之師杼軸醜
二東之賦毛公將勝苛居簡止濁徐清不下堂而爲理
有入境而先歎朋知坐閒弦望何時益賦金谷之詩遠
送邯鄲之陌愛而不見同夫樹萱

會諸友詩序

谷子者昔與說聯務蓬山出入三載事志相得情深友
于尋屬吾人秩遷迫吏畿劇愛而不見春也再華今說
復謝書坊補他職窮媛之意不擇儒林喜且把袂舊筵

解帶餘日臥玩文墨笑談平生茲歡豈多後面方永沈
沈春雨人亦淹留

啟

上東宮請講學啟

臣某等啟臣聞安國家定社稷者武功也經天地緯禮
俗者文教也社稷定矣固甯輯於人和禮俗興焉在刊
正於儒範順考古道率由舊章故周文王之爲太子也
崇禮不倦魏文帝之在青宮也好學無怠博覽史籍激
揚令聞取高前代垂名不朽伏惟皇太子殿下英睿天
縱聖敬日躋神算密發雄威立斷廓清氛祲用甯家國
兆人由是歸德六合所以推功主鬯青宮固本也分務

紫極觀政也副羣生之望作累聖之儲殿下之於天下可謂不輕矣監國理人可謂至重矣莫不拭目而視清耳而聽冀聞異政以裨聖道臣愚伏願崇太學簡明師重道尊儒以養天下之士今禮經殘缺學校陵遲歷代經史率多紕繆實殿下闡揚之日刊定之秋伏願博采文士精求碩學表正九經刊考三史則聖賢遺範粲然可觀況殿下至聖神聰留情國體幸以問安之暇應務之餘引進文儒詳觀文典商略前載討論得失降溫顏開讜議則政途理體日以增益繼業承祧永垂德美臣等行業素輕藝能寡薄願慙端士叨侍宮闈日夜祇懼無以匡輔區區微誠願效塵露輕進芻鄙庶垂采擇臨

啟如失伏用兢惶謹啟

書

與執政書

說拙於守身往年遷流嶺外亡親愁懼痼疾增加比蒙
生還曾未數歲家口在洛身徒入京及丁凶苦不獲侍
側比於他人情實不等在禮君親同貫事君無負事親
有負不能殺身以自咎責乞過祥禫報國非遲三度表
請不蒙矜遂當是文墨不盡苦心投之執事乞爲一言
聞達不敢守禮抗請直是私情乞恩若以此情可矜猶
冀聖人萬一哀憫若將遣越甘心待罪謹狀

與鄭駙馬書

晚尋莊周書以天地爲國道德爲身老室之戶牖孔門之棧闌足可反覆孝慈胎育仁義而晉朝賢士乃祖尙浮虛弛廢禮樂其所遺失將詣真宗不愈遠也老稱歸根曰靜復命知常復命近於無有知常其有知見耶斯故反照爾孔云窮神知化德之盛者神不可窮而窮之是神合於我化不可知而知之是化爲我用唯此二義緊壯生亦未始盡言焉非滎陽之深於道者孰爲輕導茲意也

張說之文集補遺卷第三

張說之文集補遺卷第四

露布 碑銘

平冀州賊契丹等露布后土神祠碑銘

西嶽太華山碑銘 常州刺史平君神道碑

太子少傅蘇君碑銘 邠王府長史陰府君碑

爲河內郡王武懿宗平冀州賊契丹等露布

大總管右金吾衛大將軍兼檢校洛州長史河內郡王
臣某前軍總管行左衛翊府中郎將上柱國定陽郡開
國公臣楊元基行軍長史朝奉大夫守給事中護軍臣
唐奉一行軍司馬通議大夫行六官郎中鄭果等言臣
聞氛祲薄霄戎狄謀夏則武庫兵動中國有弧矢之威

文昌將飛邊城用金革之事蓋以式遏姦暴大庇黎人
震蠻蕩夷明罰耀武者也伏惟天冊金輪聖神皇帝陛
下仁覆有截化被無外皇圖未臣之黨帝載不庭之俗
罔不衣被聲教浸潤豈熙望雲向風密邇遐裔而契丹
兇醜奴隸餘苗非冒頓之雄族異單于之貴種徒以錯
居遠郡漸化平時田牧混乎四毗貿遷通於三市戍人
解甲邊馬垂轡禽獸飽而忘恩蜂蠆養而恣毒敢孤亭
育自絕生成乃狼心干紀鴟張竊發虐我邊吏覆我鎮
軍大棘殘於夷落孤竹淪於荒虛陛下震赫斯之怒授
決勝之符天地合謀鬼神助順六狄舉國百蠻整眾運
櫓槍而埽除從列缺而焚蕩臣飲冰受斧指日揚麾雖

謝河閒之學竊慕任城之勇誓將首冒鋒刃躬先士卒
上假神兵之威下定鬼方之罪凶醜狂悖素無大志因
乘便利扇動姦回去歲嘗師疑一軍之盡化今春輕敵
見三帥之不歸蟻聚實繁豺牙益厲結山戎以西寇連
島夷而東入臣乃廣開形勢大振聲威移告郡邑金湯
固守傳檄諸軍犄角相應清邊道大總管建安郡王攸
宜杖鉞薊門作鎮燕國當要害之地挫虎狼之羣高壘
深溝臥舊營而不動山蛇雲鳥陣死地而無疑總管沙
叱忠義王伯禮安道買等兵臨易水使接桑河犀渠衝
將士之冠雕騎落將軍之戰四面當敵九拒乘城御史
大夫婁師德總管高再牟薛思行扞敵中山折衝外侮

訓厲鷹揚之士輯睦震驚之師其餘部散枝分離綱別
緒兵車星布巡太行而綴碣石介馬雲羅挾衡漳而連
海浦山川積雨盡消邊騎之塵草木長風咸有王師之
氣清邊士馬稍南驅而擁蹙神兵甲卒漸北逐以威臨
但合圍而持重未輕挑而卽戰重以藩臣默啜統率氈
裘控弦逾於萬騎帶甲彌於千里長驅松漠掩集柳城
巢穴是空胎卵皆覆於時賊眾兵馬屯逼幽州聞其塞
外之敗懼有舟中之敵勢力外窘心腹內乖建安郡王
攸宜蓄銳淵停乘機電發援桴作氣則山岳動搖書箭
一飛則酋渠相滅兵纜接刃元兇授首春喉蔽野京觀
起於中州積甲成山組練收於外府雖本根斯拔已蕩

滌於一隅而餘蔓所滋尙聯延於數郡賊帥何阿小等
頑凶是極奢僧爲資授其署置肆行驅掠幽陵之下不
知首惡之已擒兩河之間仍謂游魂之可恃士女遭其
逼脅軍城被其屠陷以殺戮爲事戶積虔劉之悲以劫
奪爲心家盈剝割之痛鹿城縣令李懷璧衣冠貴胄令
長崇班背我朝恩歸誠狄寇潛修甲仗輸以利器之資
見委兵權當其上將之任蠢茲狂亂暫同燎火言事剪
除方申沃雪臣乃盛兵邢趙塞井陘之隘命虎賁之將
過其衝突之鋒長史唐奉一馳使洛魏據阿曹之津縱
羽林之雄挫其侵軼之勢臣又遣將軍總管忠武將軍
行左衛翊府中郎將上柱國定陽郡開國公楊元基押

飛騎營中郎將李鐸子總管雲麾將軍行玉鈐衛翊府
中郎將康國公阿史那毗伽子總管冠軍大將軍行左
玉鈐衛翊府中郎將宋撥延子總管冠軍大將軍行左
金吾衛翊府郎將回鶻果別敕行人雲麾將軍康戡誕
子總管定遠將軍左威衛長李當義壯武將軍何義本
子總管忠武將軍何利深子總管壯武將軍俱羅囉淮
宣威將軍行左玉鈐衛翊府郎將蘇達侯斤度施子總
管定王府典軍成善威子總管押飛騎定遠將軍平原
府左果毅長上穆仙童子總管劉尙珪子總管渭川府
左果毅鹿思讓押飛騎左玉鈐衛隊正長上賈楚珪左
鷹揚衛長上花匡鼎押飛騎李言忠押飛騎沮忠揚鎮